

四庫全書薈要

• 乾隆御覽本

史部

十國春秋卷九十一

檢討吳任臣撰

閩二

嗣王世家

嗣王名延翰字子逸太祖長子也太祖既薨延翰自稱威武留後汀州民陳本聚衆三萬圍汀州延翰遣右軍都監柳邕等將兵二萬討之未幾本為邕等所斬

通鑑天成

元年正月  
破陳本

延翰為人長大美皙如玉而好讀書通經史

同光四年春二月唐莊宗得延翰權知軍府事奏三月

辛酉

薛史作  
辛亥

授延翰威武軍節度使已而莊宗遇弒明

宗改元天成夏五月甲戌加同平章事冬十月延翰乃  
取司馬遷史記閩越王無諸傳示將吏曰閩自古王國  
也吾今不王何待之有於是軍府將吏上書勸進已丑  
自稱大閩國王立宮殿置百官威儀文物皆擬天子制  
羣下稱之曰殿下赦境內追崇孝忠懿王曰昭武王改  
延平鎮曰永平而猶稟唐正朔王自是驕淫奢侈跨城

西西湖築室十餘里號曰水晶宮每攜後庭游宴從子  
城複道以出又殘暴蔑弃兄弟襲位裁逾月即出弟延  
鈞為泉州刺史而建州刺史延稟者故太祖養子素與  
王不協時王多取民間女克後庭采擇不已延鈞上書  
極諫有隙而延稟以采擇事復書不遜王益大怒十二  
月延稟遂與延鈞合兵襲福州延稟順流先至福州指  
揮使陳陶帥衆拒之兵敗陶自殺是夜延稟帥壯士百  
餘人趨西門梯城而入執守門者發庫取兵仗及寢門



王驚匿別室辛卯旦延稟執之暴其罪惡且稱王與妃

崔氏共弑先王

五國故事云或言忠懿暴終博陵之鳩故也

告諭吏民斬于

紫宸門外

### 惠宗本紀

惠宗名璘

通鑑作璘今從五代史及閩書

初名延鈞太祖次子也延稟

之寇福州也既弑嗣王而延鈞是日始至

歐史閩世家云明日璘兵

始至今從通鑑

延稟開門納之自以養子推延鈞為威武留後

天成二年春正月戊辰延稟還建州延鈞餞于郊延稟

臨訣謂延鈞曰善繼先志勿煩老兄再下延鈞銜之遜  
謝甚恭而色變夏五月癸丑唐明宗以延鈞為本道節  
度使守中書令封瑯琊王冊文曰威武軍節度觀察留  
後起復雲麾將軍檢校太傅使持節舒州諸軍事守舒  
州刺史兼御史大夫柱國瑯琊縣開國伯食邑七百戶  
王延鈞拱北華星圖南巨翼五馬之聲光首出八龍之  
價譽相高既綰珪符俄從金革在原無惠咸推晉后之  
賢當璧有徵大叶楚人之望而又心傾皎日義惡浮雲

建溪之誓帶如河閩嶺之礪山齊嶽父風宛在臣節彌  
堅是命高建牙璋洞開玉帳錫以油幢瑞節廣其綠水  
紅蓮寵冠阿衡貴同緹騎尊以師而表敬實其戶而增  
封併示貞榮仍加懿號勉膺殊渥永保令終可依前授  
起復雲麾將軍右金吾衛大將軍外置同正員檢校太  
師守中書令福州大都督府長史克威武軍節度福建  
管内觀察處置兼三司發運等使封瑯琊王冬十一月  
貢犀牛香藥海味等于唐

天成三年秋七月戊辰唐遣吏部郎中裴羽右散騎常侍陸崇進封王為閩王冬十二月度民二萬為僧由是閩地多僧王弓量田土第為三等膏腴上等以給僧道因有寺田之名其次以給土著又其次以給流寓科取之法大率倣唐兩稅而加重焉是時巨蟒見候官烏石山長六七丈色如黃金王命運土塞之鎮以佛殿

天成四年冬十月戊戌進謝恩銀器六千五百兩金器一百兩錦綺羅三千疋于唐并犀牙玳瑁真珠龍腦笏

扇白氍紅氍香藥等十二月奉國節度使知建州王延

稟冊府元龜又云王延鈞表兄延稟為建州節度使累官中書令稱疾退居里第請命

于唐以建州授其子繼雄庚子唐詔繼雄為建州刺史

長興元年春二月唐改元長興夏六月癸巳朔日有食

之冬十月王遣使賀唐郊禮畢白金七千兩及蕉牙香

藥金器百兩是時以太祖元從為拱宸控鶴二都按五國故

事威武軍忠懿王之親兵也以軍額而名之今又為拱宸控鶴都豈即威武軍而改邪

長興二年夏四月王延稟聞王有疾以次子繼昇知建

州留後帥建州刺史繼雄將水軍襲福州癸卯延稟擊  
西門繼雄攻東門王遣從子樓船指揮使仁達拒于南  
臺江仁達伏甲舟中偽降繼雄登舟撫慰仁達乘機斬  
其首梟于西門延稟方縱火攻城見之慟哭仁達出兵  
擊之衆潰左右以斛舁延稟走甲辰追擒之王見延稟  
曰果煩老兄再下延稟慙不能對王囚之別室遣使者  
如建州招撫其黨其黨殺使者奉弟繼昇及弟繼倫奔吳  
越五月斬延稟于市復其姓名曰周彥琛命弟都教練使

延政如建州撫慰吏民六月作寶皇宮以道士陳守元為  
宮主先是福州有王霸壇煉丹井壇旁皂莢木久枯一旦  
忽生枝葉井中復有白龜浮出會掘地得石銘有王霸  
裔孫之文王以謂應己遂於壇側建宮極土木之盛而  
巫者徐彥朴盛韜與守元皆用左道以進秋七月唐封  
故閩越王無諸為富義王從王請也冬十二月陳守元  
稱寶皇之命語王曰王避位受道當為天子六十年丙  
子王命長子威武節度副使繼鵬權軍府事遜位受錄道

名玄錫

長興三年春三月甲辰王復位夏六月王酷信神仙之術遣陳守元問寶皇六十年天子後將安歸守元傳寶皇語六十年後為大羅仙主徐彥等亦附會曰北廟崇順王常見寶皇其言與守元同王益自負始謀稱帝上表于唐言楚王殷吳越王鏐皆為尚書令今已薨請授臣為尚書令唐不報遂絕朝貢

閩海業談云閩王鏐日祈太乙神冊逾年雙鶴

徘徊而下  
遂謀僭號



龍啟元年春正月黃龍見真封宅王更命其宅曰龍躍

宮又造東華宮窮工極麗宮中供匠作者萬人遂詣寶

皇宮受冊備儀衛入府即皇帝位國號大閩大赦

五國故事

云敕書有日行五十里之說聞者哂之改元龍啟更名鱗

時金陵人僞綾于閩易其名曰

花絹意避其諱亦戲之也追尊父祖立五廟封高蓋山為西嶽

後吳越得

閩地封支提山為東嶽以僚屬李敏為左僕射門下侍郎子節度

副使繼鵬為右僕射中書侍郎同平章事以親吏吳勗

為樞密使帝初不欲盡蕪尊稱閩國皇翰林學士周維

岳進曰陛下欲稱國皇臣亦止稱翰林學生乃止又即位時帝既被袞冕恍惚不能自知久而方蘇許飯僧三百萬繕經二百藏尋少安

五國故事云後于諸寺賽所許願文疏中明其事

是

月唐冊禮使裴傑程侃適至海門遂以傑為如京使侃固求北還不許帝以國小地僻常謹事四隣由是境內差安夏四月封繼鵬為福王克寶皇宮使五月福州地震帝避位脩道命福王繼鵬權總萬幾初昭武帝府舍皆庫陋至是大作宮殿所費不貲秋七月戊子帝復位

以中軍使薛文傑為國計使文傑以聚斂求媚建州土豪吳光入朝文傑利其財將求光罪治之光怨怒帥衆萬人奔吳九月帝從子繼圖謀反伏誅是月殺樞密使吳勗冬十一月尊魯國太夫人黃氏為皇太后十二月以福州為長樂府改閩縣為長樂縣升永貞鎮為永貞縣感德場為寧德縣歸化場為德化縣大同場為同安縣桃林場為桃林縣又改侯官縣曰閩舊長樂縣曰侯官族誅從子親從都指揮使仁達是歲吳光請兵于吳

吳信州刺史蔣延徽不俟朝命引兵會光攻建州帝遣使求救于吳越

龍啓二年春正月上元節御大酺殿召弘文館直學士王侗等觀燈賜宴是月吳蔣延徽敗我兵于浦城遂圍建州帝遣土軍使張彥柔從弟驃騎大將軍延宗將兵萬人救之延宗軍及中塗士卒不進請薛文傑嚮食之帝亟遣使救之不及延徽攻建州垂克徐知誥以延徽與臨川王滂善恐奉滂以圖興復召之歸延徽引兵以

北我兵追擊敗之已而遣使來求成冬十一月幸泉州如皇太后母家詔沿海居民屋瓦悉得黏土是歲有野麋入東門帝曰朕土地雖小不可屬東麋也時閩語以兩浙為東麋故及之云

後福州卒歸吳越人謂有先兆

永和元年春正月丙申朔大赦改元立淑妃陳氏為皇后帝兩娶劉氏皆美而無寵后本昭武帝侍婢金鳳帝嬖之以其族人守恩匡勝為殿使二月設傾筐會于甘

露堂

時甘露堂前茶樹二鬱茂娑娑宮人呼為清人樹春時嬪嬙戲摘新芽堂中設傾筐會

夏六

月以宮人李春驚賜福王繼鵬冬十月帝素得風疾后  
與幸臣歸守明百工院使李可殷私通國人惡之莫敢  
言可殷常譖皇城使李倣于帝而后族人匡勝復無禮  
于福王繼鵬繼鵬又與弟繼韜久相惡因與倣密圖數  
人已卯帝疾甚繼鵬有喜色倣以帝必不起使壯士持  
白挺殺可殷于家庚辰帝疾少間后訴之帝力疾視朝  
詰可殷死狀倣懼而出與繼鵬率皇城衛士鼓譟入宮  
帝聞變匿九龍帳中亂兵刺之不殊宛轉未絕宮人不

忍其苦為絕之后繼韜及歸守明陳守恩匡勝皆為倣

所殺帝立凡十年

薛氏五代舊史本傳云在位十二年路氏九國志云在位十一年閻王列

傳紀年通譜皆云在位十年蓋惠宗以天成元年自立是歲丙戌至永和元年乙未正當十年而五代舊史九國志俱誤也又惠宗改元永和實在唐清泰二年是歲冬見殺而五代舊史九國志運歷圖皆無永和之號又運歷圖書惠宗見殺在天福元年丙申亦誤也謚曰齊肅明孝皇帝廟號惠宗

歐史作謚惠皇帝廟號太宗今從通鑑

惠宗未殂之先有赤虹入其室飲

以金盆水吸之立盡又芝生于殿門占者以謂不祥未

幾遇弑

康宗本紀

康宗名繼鵬惠宗長子也惠宗既殂明日辛巳繼鵬稱  
皇太后令監國是日即皇帝位更名昶上先皇帝尊謚  
既而自稱知福建節度事遣使奉表于唐大赦境內立  
李春鶯為賢妃以李倣判六軍諸衛事倣有弑君罪心  
常自疑多養死士帝患之與拱宸指揮使林延皓陰圖  
倣延皓詐附倣倣待之甚厚冬十一月壬子帝大享軍  
延皓伏衛士于內殿俟倣入執斬之倣部兵攻應天門



不克焚啓聖門奪倣首奔吳越詔暴倣弑君及殺后與  
繼韜等罪告諭中外以弟建王繼嚴權判六軍諸衛弟  
繼恭為威武軍節度使以六軍判官葉翹為內宣徽使  
叅政事未幾以直言放翹歸永泰

九國志又  
作永春

十二月賜

洞真先生陳守元號天師是歲復改長樂縣曰閩閩興  
縣曰侯官侯官縣曰長樂又改桃林縣為永春縣建明  
威殿

通文元年春正月帝改元立賢妃李氏為皇后尊皇太

后曰太皇太后冬十一月丁酉契丹立石敬瑭為大晉  
皇帝改元天福辛巳唐主自焚玄武樓唐亡國人聞之  
歎曰路王之罪天下未之聞也將如我君何是歲詔以  
金錢市馬得良馬五賜號曰金鞍使者千里將軍致遠  
侯渥洼郎驥國公

通文二年夏四月作紫微宮以水晶飾之

通鑑云土木之建倍于寶

宮遣使詣諸州伺人隱匿夏六月方士言白龍夜見螺  
峰詔建白龍寺命吏部侍郎判三司蔡守蒙納賂除官

籍貨來上是月令醫工陳寃以空名堂牒鬻官詔民有  
隱年者杖背隱口者死逃亡者族果菜雞豚皆重征之  
冬十月命弟威武節度使繼恭上表告嗣位于晉且請  
置郾都下庚子齊主誥遣使來告即位是時國人貢建  
州茶膏製以異味膠以金縷名曰耐重兒凡八枚

通文三年春正月己酉日有食之

缺

月遣內客省使朱

文進如齊賀即位冬十月乙丑遣弟繼恭進奉天和節  
并賀重午節白金五十兩于晉又進金器六事金花細

縷銀器三千兩真珠二十斤犀三十株銀裝交牀五十  
副牙二十株又進大茶八十斤香藥一萬斤朱竒銀纏  
槍二百條通箭竒三萬莖又進五色桐皮扇子海蛤麋  
韞細蕉藥木瓜等物十一月晉以左散騎常侍盧損克  
冊禮使封帝為閩國王賜帝赭袍戊申晉封威武節度  
使繼恭為臨海郡王帝聞之遣進奏官林恩白執政以  
既襲帝號辭冊命及使者是月諫議大夫黃諷與妻子  
辭訣入諫帝欲杖之諷不受杖黜為民是時諸州各計

口算錢謂之身丁錢民年十六至六十免放後漳泉二

州折米五斗

宋時取官斗較量閩時五斗得七斗三升

凡江湖陂塘皆有賦

文獻通考云先時淮南江浙荆湖廣南福建當階偽之時應江湖及池潭陂塘聚魚之處皆納官錢或令人戶占賣輸課或官遣吏主持宋太宗聞其弊詔除之又有所園水碓社酒蓮藕鵝鴨螺蚌柴薪地鋪枯牛骨溉田水利等名皆偽國舊制累詔廢省

通文四年春二月廬損至長樂府帝辭疾不見令弟繼

恭主之又遣中書舍人劉乙勞損于館損它日頗誚乙

帝怒損還無所答繼恭遣禮部員外郎鄭元弼隨損入

貢于晉三月命六宮設三昧宴

清異錄閼昶春餘宴後苑飛紅滿空昶曰彌陀

經云雨天曼陀羅華此景近似今日觀以道士譚紫霄

化工之雨天三昧宜召六宮設三昧宴

為正一先生是月有虹見于宮中夏四月巫者林興傳

神言宗室將為亂之兆帝乃命興率壯士殺叔父延武

延望并其五子作三清殿于內庭

五代史云起三清臺三層

鑄寶皇

大帝無始天尊太上老君像從道士陳守元言也凡用

黃金數千斤日焚龍腦薰陸諸香無算作樂臺下晝夜

不輟云如此可求大還丹政無大小皆興傳寶皇命決

之六月罷建王繼嚴判六軍諸衛更其名曰繼裕以季

弟繼鎔

五代史作繼鎔今從通鑑

判六軍去諸衛字未幾林興詐覺

流泉州望氣者言宮中有災乙未徙長春宮

歐史云從南宮避災

帝為長夜之飲強羣臣酒醉則令左右伺其過失從弟

繼隆以醉失禮輒斬之又屢用猜怒誅宗室左僕射平

章事延義帝叔也陽為狂愚避禍賜以道士服置武彞

山中尋召還幽於私第秋七月乙巳北宮火焚宮殿殆

盡初帝募勇士二千人為腹心號宸衛都賜予給賞獨

厚于拱宸控鶴二都或言二都怨望將為亂帝欲分隸

漳泉二州二都益怨望

五國故事云祖立而忠懿王之勛舊悉屏棄之衛兵先號威武

軍者亦弃不用因召市井屠輩別立宸衛軍名衣以羅襦銀帶飲食之器悉皆中金所給俸賜復數倍于威武

威武頗怨拱宸軍使朱文進控鶴軍使連重遇又數為帝所

侮慢內懷不平常以微言激其軍至是帝命重遇帥營

兵除餘燼且求賊不得疑重遇知縱火之謀欲誅之內

學士陳郊洩其言于重遇閏月辛巳夜重遇入直率二

都兵焚長春宮作亂使人迎延義于瓦礫中呼萬歲

國五



故事又云匣劍取延義于私第而立之

復召外營兵共攻帝時獨宸衛都

拒戰帝與后等如宸衛都比明亂兵焚宸衛都宸衛都

敗績餘衆千餘人奉帝及后等出北關

歐史云昶扶受  
娘子弟黃門衛

士斬關而  
出宿于野

至梧桐嶺衆稍稍逃散延義命從子繼業追

及于村舍帝素善射引弓殺數人頃之追兵大集帝知

不免投弓于地繼業與俱還至陀莊飲以酒醉而縊之

后及諸子繼恭皆死陳守元易服將逃亦死于兵宸衛

餘衆奔吳越重遇執蔡守蒙數以賣官之罪斬之永隆

初謚帝曰聖神英睿文明廣武應道大弘孝皇帝廟號  
康宗帝性狂躁即位之初常欲練兵襲吳乃于殿庭設  
大沙鑼於射堦示衆曰一發中之當平定江南射堦去  
階際裁數十武沙鑼復甚寬廣果一發命中左右同聲  
賀曰此一箭定天下矣帝大悅遂發兵至境上吳人聞  
之無所詬責第曰愍其有大志耳蓋實戲之也



十國春秋卷九十一



總校官庶吉士臣張能照

校對官檢討臣王鍾健

謄錄貢生臣蘇曰柄

欽定四庫全書薈要

史部

十國春秋卷九十五

二至

詳校官員外郎臣楊世綸



十國春秋卷九十二

檢討吳任臣撰

閩三

景宗本紀

景宗名曦初名延義太祖第二十八子也

五代史曰王審知少子

先是被幽私第時有白烟一穗忽起庭石之上逾時方

散延義懼密召天師陳守元禳之守元曰未必不為嘉

兆也

陳鳴鶴閩中考云延義故宅即今慶城寺天福七年捨為永隆金身羅漢院

未幾連重

遇將兵來迎延義謂景宗使收之急逃廁中久之乃出

及康宗遇害延義自稱威武節度使閩國王更今名時

通文四年閏七月壬午也是月改通文四年為永隆元

年案十國紀年薛氏舊五代史周世宗實錄唐餘錄南

唐烈祖實錄吳越脩史運歷圖紀年通譜皆云通文

四年延義自稱威武節度使改元永隆惟林仁志閩中

啟運圖云通文四年己亥閏七月延義立明年庚子改

元永隆今不從赦繫囚頒賚中外託以宸衛弒先主赴鄰國且  
移書以改元告曰六軍踴躍於門前羣臣歡呼於日下  
又遣商人間道奉表稱藩於晉然在國置百官皆如天

子之制以太子太傅致仕李真為司空兼中書侍郎同平章事遣使誅林興於泉州冬十月使者鄭元弼至大梁致康宗書求用敵國禮晉主大怒詔却貢物及福建諸綱運并令元弼與進奏官林恩部送速歸已而用兵部員外郎李知損言知損言王昶僭慢宜質留使者籍沒其貨下元弼恩於獄十二月王作新宮徙居之

永隆二年春正月晉主詔釋鄭元弼等初通文中常越海通使于契丹至是契丹主聞晉囚使臣降詔曰閩國



禮物並付喬榮放其使人令還本國故晉有是命是月

王與弟建州刺史延政有隙

通鑑云閩王曦既立驕淫苛虐猜忌宗族多尋舊怨

弟延政數以書諫之曦怒復書罵之後鄴翹杜漢崇二人爭据延政陰事告于曦由是兄弟積相猜恨

遣

親吏鄴翹監建州軍教練使杜漢崇監南鎮軍

閩置南鎮軍于

福建二州界扼往來之要

一日翹與延政議事不協訶延政曰公反

邪延政欲斬翹翹奔南鎮延政發兵攻之翹與漢崇奔

福州西鄙戍兵皆潰二月遣統軍使潘師達吳行真將

兵四萬擊延政師達軍建州城西行真軍建州城南皆

阻水為營焚城外廬舍延政乞師于吳越壬戌吳越命  
寧國節度使仰仁詮內都監薛萬忠率兵四萬援建州  
三月戊辰師達分兵三千遣都軍使蔡弘裔將之出戰  
延政遣其將林漢徹敗我兵于茶山斬首千餘級丁丑  
延政募敢死士千餘人夜涉水潛入師達壘因風縱火  
城上鼓譟應之戰棹都頭陳誨殺師達衆遂大潰戊寅  
復引兵攻行真寨建人未涉水行真及將士先遁走死  
者萬人延政乘勝取永平順昌二城自是建州兵始盛

丙戌遣使聘于唐夏四月吳越兵至建州延政以我兵已解奉牛酒請班師仰仁詮等不從營于城之西北延政懼復乞師于王王以從子泉州刺史繼業為行營都統將兵二萬救之且移書詰吳越出師之故別遣輕兵絕其糧道會久雨吳越食盡五月延政大破吳越兵于城下俘斬萬計癸未仁詮等宵遁是月唐主遣客省使尚全恭諭王與延政連和六月延政遣牙將及女奴持誓書香爐來福州與王盟於宣陵已而猜恨如故秋七

月城福州西郭以備建人乙丑晉賜鄭元弼等帛遣歸  
是月度僧萬一千人民避重賦者多與焉冬十月王因  
商人奉表于晉以自理

通鑑註云言己未常稱大號實王昶為之也

十一月

甲申晉以王為威武軍節度使兼中書令封閩國王十

二月遣客省使葛裕如唐賀仁壽節建文德殿

閩中考云當繼

鵬延曦時又有文明殿九龍殿長春宮東清門金德門諸名

永隆三年春正月延政城建州周二十里請以建州為  
威武軍自領節度使王以威武本福州軍名不許乃以

建州為鎮安軍以延政為節度使封富沙王延政復改鎮安曰鎮武而稱之夏四月王以子亞澄同平章事判六軍諸衛封瑯邪王庚辰遣將軍許仁欽以兵三千如汀州執弟延喜以歸時延喜為汀州刺史疑與延政通謀也六月召從子泉州刺史繼業還賜死福州郊外并殺其子于泉州王聞延政以書招繼業也明日族誅司徒兼門下侍郎同平章事楊沂豐宗族勲舊相繼被戮自是人不自保諫議大夫黃峻昇櫬極諫貶漳州司戶

加國計使陳匡範禮部侍郎匡範增商算之法請日進萬金因有是命已而歲入不登匡範貸省務錢足之未幾匡範卒事覺命剖棺斷尸弃之水中以黃紹頗代為國計使紹頗請令人輸錢除官從之秋七月王自稱大閩皇領威武軍節度使與富沙王延政治兵相攻福建之間暴骨如莽鎮武節度判官潘承祐請延政息兵修好延政不聽是月以從子泉州刺史繼嚴得衆心罷歸醢殺之九月以瑯邪王亞澄為威武軍節度使改號長

樂王冬十月壬子使者至汴貢晉白金四千兩象牙二十株葛五十疋軋姜蕉乳香沉香玳瑁諸物謝恩加官又進重午節白金一千兩細葛二十疋海葛鞞扇等物癸丑獻晉度支商稅葛八千八百八十疋是月王即皇帝位同平章事李敏卒延政自稱兵馬元帥

永隆四年春正月立司空李真女李氏為皇后閏月遣尚食使林弘嗣聘于唐三月進封長樂王亞澄為閩王夏六月乙丑晉主殂丁卯富沙王延政寇汀州帝發渾

泉兵五千救之又遣將林守亮入尤溪大缺宮使黃敬

忠屯尤口今乘虛襲建州國計使黃紹頗將步卒八千

為二軍聲援延政攻汀州凡四十二戰不克秋七月解

去其將包洪實陳望將水軍以禦我師丁酉兵遇于尤

口黃敬忠將戰占者言時刻未利按兵不動洪實等引

兵登岸水陸夾攻敬忠為建兵所殺俘斬二千級林守

亮黃紹頗皆遁歸八月遣使以手詔及金器九百事錢

萬緡將吏敕告六百四十通求和于富沙王延政延政



不受丙寅宴羣臣於九龍殿以減酒殺從子繼柔并贊

酒者一人鑄永隆通寶大鐵錢一當鉛錢百

五代史曰王延義鑄

大鐵錢以一當十洪氏泉志有永隆錢又云此錢徑寸四分重十銖二參文曰永隆通寶字文平漫製作不精

以銅為之是月以同平章事余廷英為泉州刺史廷英嘗矯

詔掠取良家子帝下御史劾之廷英詣帝自歸獻買宴

錢萬緡

一作千萬

明日又獻皇后錢鉅萬乃得不劾未幾復

名為相冬十二月以鹽鐵使右僕射李仁遇為左僕射

兼中書侍郎翰林學士吏部侍郎李光準為中書侍郎

兼戶部尚書並同平章事仁遇帝甥也以姿容得幸光  
準常侍夜宴以醉忤旨命執送都市斬之吏不敢輒殺  
頌繫獄中明旦視朝名復其位

按五國故事又云延義一夕醉甚命以宰相李

準弃市而準方大醉卧于市中唯呼其婢春鶯已行刑者不敢殺因致之非所明日延義視朝使名準左右因夜來之命對之

延義都不能知是夕又宴侍臣收翰林學士周維岳下

獄吏拂榻待之曰相公昨夜宿此尚書勿憂已而醉解  
釋之它日帝又曲宴羣臣皆醉去獨維岳在坐帝曰維  
岳身甚小何飲酒之多左右曰酒有別腸不必長大帝

欣然命梓維岳下殿剖視酒腸旁有解之者曰殺維岳  
無人侍陛下劇飲乃舍之帝好為牛飲荒淫無度常鍛  
銀葉為杯賜羣下飲銀葉既柔弱因目之為冬瓜片又  
名曰醉如泥酒既盈即不復置他所惟飲盡始得釋手  
羣臣醉不勝以酒過被殺者無算冬十二月遣徐績如  
唐賀仁壽節是歲貢晉鏹銀二千兩花鼓六面象牙十  
株紅蕉二百疋蟬紗二百疋餅香沉香煎香六百斤胡  
椒六百斤肉豆蔻三百斤又進白金四千兩海蛤十斤

貢蕉二十疋充端午天和節

永隆五年春正月富沙王延政稱帝改元國號殷三月  
帝立尚氏為賢妃己卯唐主殂遣使如金陵弔祭夏四  
月戊申朔日有食之殷將陳望等寇福州入于西郭既  
而敗去六月發故相王俠冢斬其尸校書郎陳光逸直  
諫鞭數百懸頸于樹以死是月帝嫁女缺公主朝士

有不賀者十二人笞之御史中丞劉贊坐不糾舉將加  
笞諫議大夫鄭元弼切諫乃得釋贊竟以憂卒是歲侯

官縣薛老峯一夕風雨如數千人誼噪狀旦則三字倒

立

先是咸通中薛逢為侯官令創亭烏石山人書其峯曰薛老峯

永隆六年春正月唐遺書責我兄弟尋戈帝引周公誅  
管蔡唐太宗誅建成元吉以復三月拱宸都指揮使朱  
文進閤門使連重遇既獲罪康宗時懼國人見討相與  
結昏自固帝果於誅殺常遊西園醉殺控鶴指揮使魏  
從朗從朗朱連黨也又常酒酣詠白居易詩以諷文進  
重遇

詩云惟有人心相對問咫尺之情不能料

因舉酒屬二人二人起流涕

再拜曰臣子事君父安有它志帝不應二人大懼會皇  
后害尚賢妃之寵欲圖帝而立其子亞澄乃使人告文  
進重遇曰主上殊不平于二公奈何乙酉后父真有疾  
帝如真第問疾文進重遇使拱宸馬步使錢達拉于馬  
上而弑之

五代史又云六月三日曦出遊醉  
歸重遇遣壯士拉于馬上而殺之

復殺王氏

宗族五十餘人鄭元弼抗辭不屈將奔建州亦被殺已  
而葬帝于福州之

缺

謚曰睿文廣武明聖元德隆道

天孝皇帝廟號景宗先是太祖克福州日桃林村中一

夕地震有聲如鳴鼓數百面比旦視之禾稻皆倒插土  
下厥後奄有全閩之地至是桃林復有鼓聲禾稻亦倒  
懸土下不數月遇禍而王氏隨滅興亡之兆如一轍焉  
識者異之

天德帝本紀

天德帝名延政

冊府元龜作延正

景宗弟也

歐史閩世家云審知子

景宗

立拜延政建州節度使封富沙王景宗肆為酗虐延政  
數貽書切諫景宗怒舉兵相攻兄弟遂成讐敵久之延

政以建州開國自立為帝國號曰大殷改永隆五年為天德元年升將樂縣為鑪州以永平鎮為龍津縣尋置

鐔州

延平鎮嗣王延翰已改為永平通鑑云以延平鎮為鐔州似小誤

立皇后張氏以

節度判官潘承祐為吏部尚書節度巡官楊思恭為兵部尚書未幾以承祐同平章事思恭遷僕射錄軍國事然牙叅及接鄰國猶如藩鎮禮夏五月潘承祐上書陳十事命削官爵勒歸私第是歲加封故靈昭王延稟為武平威肅王



天德二年春正月鑄天德通寶大鐵錢一當百

董道錢譜曰建

州王氏錢面文天德重寶背文穿上有殷字洪氏泉志曰按王延政以建州建國稱殷故幕文為殷字通寶重寶之異亦當時鑄此二品耳是月唐遣使以書來問兄弟何故相尤

隨荅書斥唐奪楊氏國唐主怒遂絕和好三月朱文進連重遇弒其君文進遂自立為閩王帝遣統軍使吳成義討之不克秋八月癸丑晉以朱文進為威武軍節度使知閩國事冬十月帝遣陳敬侔將兵三千屯尤溪及古田盧進將兵二千屯長溪十一月泉州指揮使留從

效與王忠順董思安執泉州刺史黃紹頗斬之請皇從  
子繼勲主軍府事遣副兵馬使陳洪進來獻捷且函紹  
頗首至洪進過尤溪福州戍兵數千人遮道洪進紹之  
曰義師已誅朱福州吾倍道逆嗣君子建州爾輩尚守  
此何為衆遂潰大將數人從洪進詣建州帝以繼勲為  
侍中領泉州刺史從效及忠順思安洪進皆署都指揮  
使漳州將程謨殺刺史程文緯奉皇從子繼成權州事  
汀州刺史許文楨賁表來降十二月癸丑晉加朱文進

同平章事封閩國王文進聞黃紹頗死大懼遣統軍使

林守諒內客省使李廷鈺攻泉州鉦鼓相聞數百里

一作

五百里  
疑誤

帝遣大將軍杜進將兵救泉州留從效開門與

福州兵戰大破之斬守諒執廷鈺帝復遣統軍使吳成

義帥戰艦千艘攻福州文進乞援于吳越遣子弟以為

質是月唐以洪州營屯都虞候邊鎬為行營招討諸軍

都虞候將兵同樞密副使查文徽翰林待詔臧循入寇

文徽自建陽進屯蓋竹聞漳泉汀三州已降于我而鏞

州將張漢卿復將兵八千人將至文徽退保建陽循屯  
兵邵武邵武民導我兵襲破循軍執循歸建州斬之吳  
成義聞唐兵至詐使人告福州吏民曰唐助我討賊臣  
大兵至矣福人大懼乙未朱文進遣同平章事李光準  
來獻國寶丁酉南廊承旨林仁翰刺殺連重遇于第福  
人復殺文進迎成義入城于是函二首送建州

天德三年春正月臣民共迎帝歸長樂府帝以方有唐  
兵未暇徙都詔以福州為南都

八閩通誌及閩  
書皆作東都

以從子

門下侍郎同平章事繼昌督南都內外諸軍事鎮福州以飛捷指揮使黃仁諷為鎮遏使將兵衛之復國號曰閩發南都侍衛及兩軍甲士萬五千人

福州侍衛之外有左右軍置軍

使以領之一曰兩軍謂拱宸控鶴兩都詣建州以拒唐二月唐查文徽請

益兵唐主以天威都虞候何徽洙為建州行營招討馬步都指揮使將軍祖全恩為應援使姚鳳為都監會兵數千入寇自崇安進屯赤嶺帝遣僕射楊思恭統軍使陳望將兵萬人拒之列柵水南旬餘不戰唐人不敢戰

思恭以帝命督望戰趣之再三望不得已涉水與唐戰  
全恩等以大兵當其前別使奇兵出我師後我師敗績  
望戰死思恭僅以身免帝大懼嬰城自守名董思安王  
忠順將兵五千來建州分守要害三月著作郎陳繼珣  
指揮使李仁達合謀潛入南都說鎮遏使黃仁諷入府  
執皇從子繼昌及吳成義殺之  
先是繼珣叛奔福州為  
景宗畫策取建州至是  
不自安故仁達要與同謀○閩王列傳九國志  
閩中實錄皆云四月殺繼昌今從十國紀年 已亥仁  
達立僧卓巖明為天子稱藩于晉帝聞之族仁諷家命

統軍使張漢真將水軍五千會漳泉兵討巖明夏四月  
漢真至南都攻東關仁諷聞家誅滅開門力戰大破我  
兵漢真被執死之

通鑑云執漢真入城斬之

仁達既立巖明自判六

軍諸衛事仁諷屯西門繼珣屯北門仁諷從容謂繼珣  
曰人之所以為人者以有忠信仁義也吾頃常有功于  
富沙中間叛之非忠也人以從子託我而與人殺之非  
信也屬者與建兵戰所殺皆鄉曲故人非仁也棄妻子  
使人魚肉之非義也此身十沈九浮死有餘媿因拊膺

慟哭繼珣曰大丈夫狗功名何顧妻子宜置此事勿以  
取禍仁達聞之使人告仁諷繼珣謀反皆殺之由是兵  
權盡歸仁達五月丁巳仁達請嚴明大閱戰士陰令人  
刺殺之陽狼狽驚走已乃自稱威武留後用保大年號  
奉表稱藩于唐亦遣使入貢于晉是月唐兵圍建州屢  
破泉州兵許文稹敗唐兵于汀州執其將時厚卿秋七  
月或告福州援兵有叛志

是歲正月赴建  
州拒唐之兵

帝收其鎧仗

遣還伏兵於隘盡殺之死者八千餘人脯其肉以歸為



食唐將邊鎬拔鐔州帝遣使稱臣於吳越請為附庸以乞師八月唐兵圍建州久建人離心有謂董思安宜為去就計思安誓不負王氏衆感其言無叛者丁亥唐先

鋒橋道使王建封先登建州城陷

春明退朝錄云李璟發兵攻建州王延政

城有白虹貫城未幾城陷舍宇焚蕪殆盡

帝出降王忠順戰死思安整衆奔

泉州初唐兵來建人苦王氏之亂與楊思恭之重歛爭

伐木開道迎之及城破縱兵大掠焚宮室廬舍幾盡是

夕寒雨凍死者枕藉于道建人失望九月許文稹以汀

州皇從子繼勲以泉州繼成以漳州皆降唐唐置永安

軍于建州冬十月盡遷王氏之族于金陵唐以帝為羽

林大將軍斬楊思恭以謝建人保大五年改帝安缺軍

節度使降封鄱陽王鎮饒州九年徙封光山王五國故事云封

自在王尋改光山王疑非是未幾薨贈福王謚曰恭懿閩傳七主凡

五十三年按歐史以閩歷國五十五年運歷圖則云五十六年五代舊史閩王列傳紀年通譜閩中

實錄皆云六十年五代史註又云六十一年諸說紛紛不一惟是閩亡之歲南唐書江南錄通鑑則云開運二

年為唐保大三年歐史則云開運三年為唐保大四年此所未詳云

論曰太祖開國時相傳有僧陳騎馬來騎馬去之讖說者遂以司空拜泉州刺史為丙午歲而五代史諸書載唐兵破建州為保大之四年與讖語頗合至司馬公所紀司空為福建觀察使始于景福二年而天德帝歸金陵則在開運二年與彼所稱傳國六十一年及五十五年何至不侔也今畧依凍水編年以次其大概云

十國春秋卷九十二



畧知書好兵法朱文進之僭立也從效時為泉州散指  
揮使與其黨王忠順董思安及所親蘇光誨相與圖議  
興復一日謂同列曰朱文進屠滅王氏遺腹心分據諸  
州吾屬世受王氏恩而交臂事賊有如富沙王克復福  
州吾屬死有餘媿衆以為然頃之從效引軍中所善壯  
士夜飲于家紹之曰富沙王已平福州密旨令吾屬討  
偽刺史黃紹頗諸君狀貌皆非久處貧賤者從吾言富  
貴可圖不然禍且立至于是募敢勇壯士得副兵馬使

陳紹進等五十二人夜持白梃踰城而入擒紹頗斬焉  
泉州有繼勲者故武肅王諸孫也即持印詣之請主軍  
府從效等三人自署平賊統軍使洪進等皆為指揮使  
是時唐元宗遣將討王氏之亂圍福州會吳越發兵援  
文進于是唐將但克汀建而歸福州遂為吳越所有從  
效乘機竊其地乃以兵劫繼勲送江南自領漳泉二州  
留後唐元宗即以泉州為清源軍授從效節度使漳泉  
等州觀察使閩中五州之分自此始也未幾累授同平

章事兼侍中中書令封鄂國公進封晉江王從效在郡  
專以勤儉養民為務常衣布素置公服于中門出視事  
則服之入則復衣敝布自言我素貧賤不可忘本也民  
甚愛之天德帝有二女在郡從效事之如故資給甚厚  
每歲取進士明經謂之秋堂及唐人淮甸失守從效因  
吳越奉表于周世宗世宗以割地故不納宋建隆初唐  
元宗遷都南昌從效大懼以為見討乃遣子紹基一作  
鎮又  
鑄貢唐又遣使假道吳越入貢于宋宋太祖特命使厚

賜以撫之使未至而從效發疽薨

五國故事云建隆壬戌歲從效缺自五月

發疽至于七月不愈中外音問不通羣校頗有異議一日先鋒指揮使王亡名請入省疾而從效危篤乃以缺貽之從効死衆立張漢思為帥以陳洪進副之使王亡名出守漳州不聽又遣戎莆田亦不聽因使衆擊之垂困送同安縣囂

廖之未幾而薨

年五十有七唐贈太尉靈州大都督從

效無嗣以兄從願之子紹基紹鑑為子從效寢疾時從願守漳州紹基入金陵紹鑑尚幼及其歿也州人立紹鑑未幾統軍陳洪進執紹鑑歸于唐其將名吳越為叛于是推立副使張漢思事具洪進傳中從效再從弟仁



諫宋淳化中為泗州長史雖藜藿不充未嘗妄干人太  
宗聞之名赴闕特遷揚州觀察支使

陳洪進字濟川先世本臨淮人已而遷泉州居仙遊縣  
之楓亭遂為仙遊人幼有俠節頗讀書習兵家言長以  
材勇隸兵籍從攻汀州先登補副兵馬使從留從效殺  
黃紹頗以首送建州天德帝命為本州馬步行軍都校  
已又為統軍使與副使張漢思同領兵柄累立戰功從  
效既歿少子紹鑑典留務月餘洪進推漢思為留後自

為副使

一作四門  
指揮使

時宋建隆三年也漢思年老不能治

事軍務皆決于洪進漢思諸子並為牙將內懷不平潛有去洪進意明年夏四月漢思大享將吏伏甲于內將害洪進酒數行地忽大震棟宇將傾坐立者不自持同謀者以告洪進洪進亟去衆驚悸而散漢思事不成慮洪進先發常嚴兵為備洪進子文顯文顥皆為指揮使勒所部欲擊漢思洪進不許一日洪進袖銀鎗從二子常服安步入府中直兵數百人皆叱去之漢思方處內

齊洪進即局其門使人叩門謂漢思曰郡中軍吏請洪進知留務衆情不可違當以印見授漢思惶懼不知所爲即自門間出印與之洪進即日遷漢思別墅遣使請命于江南江南以洪進爲清源軍節度泉南等州觀察使時宋平澤潞下揚州取荊湖洪進大懼遣牙將魏仁洛間道奉表納款貢白金千兩乳香茶葉皆萬計太祖遣使撫諭且以其事詔江南江南後主聽命于是乾德二年宋改清源軍爲平海軍授洪進節度泉漳等州觀

察使檢校太傅賜號推誠順化功臣鑄印賜之以文顯  
為平海軍節度副使文顯為漳州刺史是年夏洪進丁  
家艱旋起復理軍府事洪進以每歲修貢朝廷多厚歛  
于民民貲百萬以上者令為試協律奉禮郎蠲其丁役  
及江南平吳越忠懿王朝宋洪進不自安遣子入貢太  
祖因下詔名之遂入朝道聞太祖晏駕歸鎮發哀太宗  
即位加檢校太師太平興國三年四月朝京師禮遇優  
渥又增食邑加其子文顯為團練使文顯文頊並為刺

史洪進因上表言臣遠辭海嶠入覲天墀獲親咫尺之  
顏疊被駢蕃之澤六飛遊幸每奉屬車之塵三殿宴嬉  
屢挹大樽之味旬浹之內雨露滂臻至于童男亦荷殊  
獎恩榮若此報効何階願以所管漳泉兩郡獻于有司  
太宗嘉納之凡為縣十四戶十五萬一千九百七十八  
兵萬八千七百二十七遂授洪進武寧軍節度使同平  
章事留汴京奉請諸子皆授以近郡優賜之後封杞國  
公進封岐國公洪進年老富貴已極上言求致仕優詔

免朝請居無何病卒年七十二贈中書令謚曰忠順洪  
進在泉州日方晝有蒼鶴翔內齋引吭向洪進洪進視  
之有魚鰓其喉即以手採取之魚猶活鶴馴擾齋中數  
日而後去人多異焉洪進弟銛為泉州都指揮使開寶  
中官漳州刺史

文顯字仲達歷泉州馬步軍都軍使右軍押衙宋命為  
平海節度副使累加檢校太保及洪進朝宋授通州團  
練使知泉州未幾代還又為青齊廬壽西京水南北陝

州四州都巡檢使文顯與諸弟不睦咸平初為言者所劾詔戒諭之以疾改通許鎮都監卒

文顯初為泉州衙內都指揮使俄權知漳州宋命為漳州刺史數年求還泉州署行軍司馬洪進朝宋授房州刺史改康州端拱初出知同州咸平初知耀州徙徐州坐用刑失入貶官已而以洪進納土功復遷康州刺史祥符東封命知濮州馳道所出供億頗勤至詔褒之改衡州代還以老疾請致仕卒

文顗始為泉州衙內都指揮使知漳州宋初擢滁州刺史俄召歸京師奉朝請景德中改光州以久次領和州團練使歷知數州軍所至無能稱

文頊頗知書工畫本文顯子也洪進在泉州日有相者言一門受祿當至萬石時洪進與三子皆已領州郡而文頊始生洪進欲應其言乃取為己子錫名與諸子齒文頊歷衙內都監使宋命領順州刺史歸朝為通州刺史改舒州卒



陳應功莆田人弱冠忠義自許宋太平興國初陳洪進  
尚據漳泉應功詣洪進條陳古今天下分合之由備述  
天命人心歸屬之意洪進傾耳聽之遂納土于宋其年  
游洋鎮竊發應功至軍前請為先鋒竟為賊所殺

陳齊鵬莆田人事陳洪進為指揮使常勸洪進輸誠納  
土兩全忠孝後洪進卒歸于宋齊鵬與有力焉

陳仁璧莆田人也仕陳洪進為泉州別駕洪進既納土  
豪猾有負險為亂者仁璧徒步謁轉運使楊克巽畫策

平之宋改仁璧為陽翟主簿

劉昌言字禹謨泉州南安人也七歲能屬文辭藻靡麗

陳洪進辟功曹叅軍洪進遣子文顯入貢汴京令昌言

偕行宋太祖親勞之太宗時洪進歸朝名謂曰覽洪進

表委命盡心非卿潤色邪洪進改鎮徐州又辟昌言推

官後舉宋進士判審官院未百日為樞密副使累官工

部侍郎咸平二年卒贈尚書有文集三十卷

太宗時有  
言昌言閩

語恐奏對難會太宗怒曰我自會得其眷注如此昌言  
嘗作下第詩云惟有夜來蝴蝶夢翩翩飛入刺桐花人

皆稱之

徐熙字大雅南安人父居讓從陳洪進為清溪令洪進  
奇熙文以弟女妻之署以府職辟不就著楚雁賦見志  
尋辟掌牋奏洪進歸宋熙應進士舉官終越州通判熙  
好學善談精筆札後以狷躁罷職憤恚而卒常換三酌  
酸文世稱精絕畧曰渭川凝碧早拋釣月之流高嶺排  
青不逐眠雲之客又曰年年落第春風徒泣于遷鶯處  
處羈遊夜雨空悲于斷雁

徐昌嗣莆田人以明經除秘書郎陳洪進辟掌書記首  
勸納土洪進欲害之昌嗣潛走汴京江南平洪進始悟  
其忠乃命其弟昌圖與陳仁愿奉表歸宋

論曰朱文進誅屠王氏少長無遺已晏然據神器矣而  
從效以區區牙校削平賊黨奄有漳泉比至洪進納土  
再傳兩姓雖曰人謀亦運會使然哉迄今傳永春從效  
故居其地名留變者抑其流風猶有未泯者與

十國春秋卷九十三

十國春秋卷九十四

檢討吳任臣撰

閩五

列傳

秦國太夫人董氏

太祖后任氏

龍啓太后黃氏

嗣王夫人崔氏

惠宗后劉氏

繼后金氏

后陳氏

康宗元妃李氏

后李氏

景宗后李氏

賢妃尚氏

天德皇后張氏

太夫人董氏太祖之母也王緒入閩令軍中無得以老弱自隨違者斬惟太祖昆弟扶母從軍緒責之曰軍皆有法未有無法之軍汝違吾令而不誅是無法也太祖等曰人皆有母未有無母之人將軍奈何使人棄其母緒怒命斬太夫人太祖等曰我等事母如事將軍既殺

其母安用其子請先母死將士皆為之請乃舍之後以太祖貴累封秦國太夫人天祐元年太祖建報恩定光多寶塔以資司空暨太夫人冥福龍啓時惠宗立五廟復追宗太夫人上尊謚云

太祖后任氏不知其世系太祖時封

缺

國夫人居數年

薨葬福州之鳳池山後太祖亦合葬焉龍啓初追崇曰

缺

皇后

太后黃氏泉州人故威武節度推官滔之族女父訥裕



官工部侍郎太祖聘為側室惠宗其所出也唐明宗封

魯國夫人惠宗貢白金五千銖以謝龍啓初尊為皇太

后二年

十一月  
癸丑

惠宗謁黃氏家廟田鋪緹錦木被綵繒

因名里曰錦里驛曰錦田居曰錦第溪曰錦溪墓院曰

錦溪院

是役也惠宗命錫書于靈秀山曰凡登山  
有道徐行則不困措足平穩之地則不跌

又太

后族子克家言地濱海遇秋日輒如城郭之冬惠宗因

命沿海屋瓦悉得黏土其加厚太后家如此薛文傑之

死太后與有力焉通文元年尊為太皇太后

嗣王夫人崔氏博陵人

或云補闕崔道融女黃滔祭道融文有云賢王之結嘉姻時

議之期良輔

貌陋而淫性極妬嗣王多選良家子為宮人夫

人輒搜其美者幽之別室繫以大械刻木為人手批其頰又以練束侍婢而鞭之練染血赤乃止復為鐵錐刺

人面或錐其臂一歲中死者三十四人後夫人病見以

為祟而薨或云太祖暴終實夫人鵠之一日雷震死庭

中

五國故事云一旦盛暑天無纖雲而霆電擊博陵薨于中庭

夫人雅信佛法奉福

州僧慧稜為師自稱曰練師

五燈會元載闍師夫人崔氏遣使送衣物與慧稜禪

師曰練師就大師請回信師曰傳語練師領取回信須  
史使却來師前揖便回師明日入府練師曰昨日謝大  
師回信師曰却請昨日回信看練師展兩手師問師  
曰練師適來呈信還愜大師意否師曰猶較些子

惠宗后劉氏本南漢清遠公主貞明三年太祖為惠宗

娶之

南漢已  
有傳

惠宗繼后金氏賢而不見答自陳后立而后寵益衰後  
事不概見

后陳氏福唐人也

金鳳外傳云福  
清萬安鄉人

父侯倫少年美丰姿

唐末事福建觀察使陳巖以色見嬖得出入卧內與巖

妾陸氏通有娠未幾巖卒妻弟范暉自稱留後陸託于暉生一女是夕夢飛鳳入懷因小字金鳳冒姓陳即惠宗后也太祖入閩攻殺暉金鳳流落民間族人陳匡勝收養之開平三年太祖選良家女充後宮時金鳳年十七性度窈窕善歌舞通鑑又云太祖召為才人通鑑云本雷知侍其寵幸與黃夫人比常築水晶宮于西湖旁列亭榭十餘里金鳳時扈從出子城複道中出遊然不及蕩惠宗時御紫宸門宣見大悅封為淑妃甚嬖之龍啓元年

立為皇后追封其假父陳巖威武軍節度使母陸氏長  
樂郡夫人族人守恩匡勝為殿使始築長春宮居之惠  
宗數于其中為長夜之飲每宴輒燃金龍燭數百枝環  
左右光明如晝勅宮婢數十擎杯盤多金玉瑪瑙琥珀  
玻璃之屬以次遞進不設几筵酒酣裸逐嬉笑以為樂  
外傳云延鈞張長枕大牀擁金鳳與諸宮女裸卧又遣  
使于日南造水晶屏風周圍四丈二尺與金鳳淫狎于  
內令宮女隔屏覘之二月上已延鈞修褉桑溪金鳳偕  
後宮雜衣文錦列坐水次流觴娛暢沉麝之氣環珮之  
聲達于遠近途中絲竹管弦更番迭奏端陽日造絳舫  
數十于西湖每舫載宮女二十餘人衣短衣鼓楫爭先

延鈞御大龍舟以觀金鳳作樂遊曲使宮女同聲歌之  
曲曰龍舟搖曳東復東采蓮湖上紅更紅波滢滢水溶  
溶奴隔荷花路不通又曰西湖南湖開綠舟青蒲紫蓼  
滿中洲波渺渺水悠悠長奉君王萬歲遊遊人士綺繡  
夾岸雜香如市惠宗晚年得風疾后遂與幸臣歸守明私百工

院使李可殷少與守明狎因守明以通于后出入殿內

惠宗常命錦工造鏤金五綵九龍帳于長春宮

一云織八龍帳

外以已為一龍既成進之守明日宿于內國人歌曰誰謂九龍

帳惟貯一歸郎李倣作亂后與匡勝守明俱見殺

康宗元妃李氏故惠宗甥女同平章事敏之女也累封

梁國夫人康宗嬖李后遇夫人甚薄終于其位

康宗后李氏本惠宗宮人名春鶯

一云李微之妹疑非金鳳外傳云延鈞

為春燕造東華宮以珊瑚為栳榆琉璃為櫺瓦檀楠為梁棟真珠為簾幙範金為柱礎

有色康宗

烝焉惠宗已病康宗因陳后以求春鶯惠宗怏怏與之

康宗嗣位立為賢妃行則同輿坐則同席及通文改元

復立為皇后別造紫薇宮為皇后遊幸之所土木之盛

逾于東華連重遇之亂康宗同后出北闕至梧桐嶺為

皇從子繼業所殺

一云觸墻死時通文四年七月十三日也

葬蓮花山側冢

上有樹生異花似鴛鴦交頸時人名曰鴛鴦樹先是陳  
后與惠宗亦葬是山後南唐師敗李仁達于古城亂兵  
發諸陵剔取寶玉后及陳后容色如生鮮血流漬山為  
之赤世遂呼其山曰胭脂山

景宗后李氏司空李真女也永隆四年冊立為皇后嗜酒  
剛愎景宗寵而憚之朱文進之亂實后激成之已而見殺  
賢妃尚氏金吾使保殷之女也

閩錄作尚可殷之女今從十國紀年

永隆

初立為賢妃妃有殊色景宗最憐寵焉醉中妃所欲殺



則殺之所欲宥則宥之

天德皇后張氏故富沙王妃也天德元年富沙王稱殷

帝立為皇后

武肅王審邽

子延彬延美延武孫繼崇繼勳

太祖從弟彥復想

太祖子延喜

延武

延望

延宗

子繼業

從子延興

延虹延豐延休附

族子延嗣

審邽

五國故事圭

字次都太祖仲兄也乾寧元年權泉州刺

史三年實授四年加工部尚書五年加金紫光祿大夫  
檢校戶部尚書光化二年加兵部尚書瑯琊郡開國男  
三年加左僕射進開國侯尋授威武軍節度副使天復  
二年加司空三年加司徒進封開國公食邑七百戶在  
政十二年為人喜儒術通春秋善吏治流民還者假以  
牛犁興完廬舍中原亂公卿多來依閩審邽遣子延彬  
作招賢院禮之振賦以財如唐右省常侍李洵翰林承  
旨制誥兵部侍郎韓偓中書舍人王滌右補闕崔道融

大司農王標吏部郎中夏侯淑司勳員外郎王拯刑部  
員外郎楊承休弘文館直學士楊贊圖王侗集賢殿校  
理歸傳懿及鄭璘鄭戩等皆賴以免禍卒謚武肅王葬  
于晉江皇積山徐寅謨墓碑文

碑文有皇者天皇積者  
勲績之語人以為獻諛

子延彬延美延武

延彬天祐初太祖承制加平盧節度使權知泉州軍州  
事二年實授開平三年加金紫光祿大夫轉右僕射封  
瑯琊郡開國男尋轉司空四年加雲麾將軍乾化二年

授特進階加檢校太保進封開國伯五年加檢校太傅  
權知泉州刺史四年加檢校太尉延彬再任泉州前後  
歷二十六年

一云十七年

吏民安之每發蠻舶無失墜者時

謂之招寶侍郎會得白鹿紫芝僧浩源以為王者之符  
延彬由是漸驕縱密遣使浮海貢梁求泉州節鎮事覺  
太祖誅浩源及其黨黜延彬歸私第卒贈雲州節度使  
兼侍中葬雲臺山閩人亦謂之雲臺侍中延彬多藝工  
詩歌頗通禪理而性豪華巾櫛冠履必日一易解衣後

輒以龍腦數器覆之先是延彬生泉州佛舍始生時有  
白雀巢于堂中凡三十年迄延彬歿遽失所在人咸異  
之五國故事云延彬日亭午方起雅能為詩辭人禪客  
謁見多為所屈宅中聲伎皆北人將求伎必圖已形  
而書其歌詩于圖側題曰才如此貌如此以是冀其見  
慕也進士徐寅常為人生幾何賦後因修合求藥于延  
彬延彬即書賦解于札尾報之其風流多此類也延彬  
有詩曰兩衙前後訟堂堂清軟錦技袍擁鼻行雨後綠苔  
侵履跡春深紅杏鎖鶯聲因携久醞松醪酒自煮新抽  
竹笋羹也解為詩也為政儉家何似謝宣城人多誦之  
延美龍啓二年官泉州刺史無何卒

延武永和元年任泉州刺史有能名尋加太傅進開國

伯通文元年改建州刺史

繼崇延彬之子也長興元年惠宗墨勅權判泉州事三年加檢校司空龍啓元年加檢校太保封瑯琊開國男繼勲延美之仲子也留從效復泉州持州印詣其第請主軍府事時天德帝已稱殷國即命繼勲為侍中領泉州刺史明年繼勲納款于唐會李弘義為唐威武節度使繼勲致書修好弘義以泉州故隸威武軍怒其抗禮遣弟弘通治兵相攻

通鑑開運三年四月李弘義遣弟弘通將兵萬人伐繼勲是時

從效為都指揮使蓄異志陽以言怵繼勲曰弘通兵勢甚盛士卒以使君賞罰不當莫肯力戰使君宜避位自省乃廢繼勲歸私第代領其事隨勒兵擊弘通破之表聞于唐唐名繼勲歸金陵

彥復太祖從弟也景福初彥復為都統同太祖攻范暉于福州親犯矢石指授方畧遂陷福州城暉走死頃之官泉州刺史終于其職

想亦太祖從弟隨太祖入閩以銀青光祿大夫上柱國

攝福州長樂縣令頗負幹材縣事以治

延喜太祖庶子也永隆中官汀州刺史景宗疑延喜與  
富沙王通謀遣將許仁欽執之以歸後為朱文進所殺  
延武太祖之子也于惠宗為諸弟通文時官建州刺史  
會巫者林興與延武不相能託鬼神語云延武及延望  
將為變遂被殺并及其子

延望太祖子也通文時官戶部尚書與延武同為林興  
所誣因被殺并及其子



延宗太祖子也任汀州刺史有聲已遷驃騎大將軍太祖凡二十八子史冊所見者嗣王惠宗景宗天德帝而外止延喜延武延望延宗數人其行次亦復不可考云  
延宗子繼業

繼業嗣守汀州亦以治績聞連重遇之亂繼業追康宗于梧桐嶺康宗投弓謂之曰卿臣節安在繼業曰君無君德臣安得有臣節新君叔父也舊君昆弟也孰親孰疎遂弑康宗于施莊永隆初改泉州刺史已而為行營

都統將兵救建州吳越兵遁還明年建州以書招之或  
告繼業與楊沂豐潛通富沙王會繼業還福州賜死郊  
外并殺其子于泉州

延興太祖伯兄司空之子也延興有弟延虹延豐延休  
司空皆舍之而讓太祖知軍務事後不知所終

又延晦亦司空

子疑  
先卒

延嗣太祖族子也為人慨切好直言以道義自任當時  
自為唐五經光啓初隨太祖入閩梁篡唐封太祖為閩

王延嗣諫曰義不帝秦此其時也是時強藩巨鎮多僭號稱帝太祖不無心動延嗣反復極諫力言不可太祖雖不樂其言然終身不失臣節延嗣亦與有功云

惠宗子繼韜 繼鎔 臨海郡王繼恭

建王繼嚴 從子仁達 繼圖

景宗子閩王亞澄 從子繼柔 繼隆

天德帝子繼沂 從子繼昌 繼成

繼韜惠宗次子也康宗為福王時與繼韜不協李倣之

變同陳后死焉

繼鎔惠宗第三子也康宗既罷繼嚴兵柄以繼鎔判六

軍

繼鎔一作繼鏞

繼恭惠宗子也

歐陽五代史及冊府元龜皆以繼恭為景宗子誤

通文中官威

武節度使康宗使上表告嗣位于晉明年晉封繼恭臨海郡王連重遇之亂繼恭與諸王並死于陔莊

繼嚴亦惠宗子康宗時封建王判六軍諸衛事得士卒心康宗內忌之俄罷其兵柄更其名曰繼裕永隆時仍

名繼嚴授泉州刺史復得衆為景宗所惡鳩死

仁達惠宗從子也積功至樓船指揮使王延稟再攻福州仁達伏甲舟中偽立白幟請降因斬延稟子繼雄復縱兵擊其衆左右昇延稟走為仁達所獲仁達既有大功隨典親兵性慷慨言事無所避惠宗心忌之一日謂仁達曰趙高指鹿為馬以愚二世果有之邪仁達曰秦二世愚故趙高指為馬非高能愚二世也今陛下聰明朝廷官不滿百起居動靜陛下皆知之敢有作威福者

族滅之而已惠宗慚賜與金帛慰安之退而謂人曰仁達智畧在吾世猶可用不可遺後惠卒誣以罪殺之繼圖惠宗從子也龍啓中謀反伏誅

亞澄景宗子也永隆中官同平章事判六軍諸衛封瑯琊王居數月遷威武節度使兼中書令改號長樂王明年進封閩王連重遇朱文進之亂也亞澄母李后實以語激成之事具本紀中而亞澄亦死于其難

繼柔景宗從子也景宗常宴羣臣于九龍殿繼柔不勝

杯勺私減其酒景宗怒並贊酒客將俱斬之

繼隆亦景宗從子一日以醉失禮為景宗所殺國人寃之  
繼沂天德帝之子也國亡後居廣陵周世宗得揚州撫  
存有加

繼昌天德帝從子也天德帝建殷國以繼昌為門下侍  
郎同平章事未幾改殷為閩以福州為南都以繼昌鎮  
其地督南都內外諸軍事繼昌暗弱嗜酒不恤軍士李  
仁達作亂閩與戍將吳成義同死于府舍

繼成天德帝從子也朱文進滅王氏繼成與繼勳二人以踈遠獲全及留從效以泉州奉繼勳漳州將程謨亦殺刺史程文緯立繼成權州事繼成納款于唐久之唐徙繼成和州刺史遂終于其官

太祖女某郡主

郡主失其封號太祖女也福州之北嶺有胭脂團周匝二百餘步膏潤不毛四時作殷紅色相傳郡主梳粧樓在焉



十國春秋卷九十四

十國春秋卷九十五

檢討吳任臣撰

閩六

列傳

韓偓

崔道融

楊沂豐

韓偓字致光京兆人唐龍紀元年進士累遷諫議大夫翰林學士昭宗幸鳳翔進兵部侍郎承旨昭宗反正勵精政事偓處分機密率與意合欲相之屢讓不受朱全

忠忌偃貶濮州司馬昭宗執偃手流涕曰左右無人矣  
再貶榮經尉徙鄧州司馬昭宗被弑哀帝復召為學士  
還故官偃不敢入朝挈族來依太祖僑居南安天祐三  
年復有前命偃又辭為詩曰豈獨鴟夷解歸去五湖漁  
艇且鋪糟已而梁篡唐乾化三年復召亦辭不往龍德  
三年卒于南安龍興寺葬葵山之麓所著有內庭集金  
鑒別紀自貶後以甲子歷歷自記所在其詩皆手寫成  
帙歿之日家無餘財惟燒殘龍鳳燭一器而已子寅亮

終于閩

南唐近事云韓寅亮僊子也常言僊捐館日溫陵帥聞其家藏箱笥頗多而緘緘甚密使親信

發覲惟得燒殘龍鳳燭金縷紅巾百餘條有老僕泣然

言曰公為學士日常視草金鑒殿深夜方還翰苑當時

晉宮妓東燭炬以送公悉藏之後延平有老尼亦說斯事尼即僊之妾也

崔道融荊州人以徵辟為永嘉令累官右補闕避地來

閩依太祖未幾病卒道融素與黃滔善其卒也滔為文

祭之有云識通龜策耀握靈珠國風騷雅王佐謀訐素

安之涕泣泣然劉氏之宗祧莫扶

楊沂豐

歐陽五代史作楊沂

唐宰相涉從弟也遭亂依太祖與徐

寅王淡同居莫府以風雅倡和閩士多宗之太祖諸孫  
繼業為汀州刺史沂豐為士曹參軍雅相親善永隆時  
繼業賜死或告沂豐實與謀沂豐方侍宴景宗麾左右  
收之繫獄中明日斬于市族其家時年八十餘國人哀  
之淡故唐相溥子

論曰昭武立國賓至如歸唐衣冠卿士跋涉來奔若李  
洵韓偓王標夏侯淑王淡楊承休王滌崔道融王拯楊  
贊圖王侔楊沂豐歸傳懿諸人未易指屈今畧采其可

考者著於篇餘則不具錄焉

陳嶠

黃滔

徐寅

翁承贊

陳嶠字延封遠祖邁唐初為莆田令家焉後數世有南安尉真真生堯堯生齊齊有九子嶠其長也弱冠能文與高陽許龜圖江夏黃彥修居莆田北巖精舍未幾復居北平山讀書光啓三年登進士第釋褐攝京兆府參軍太祖兄弟入閩辟為大從事遷大理評事兼監察御史已又奏授大理司直兼殿中侍御史光化三年十月

卒年七十五所著表記奏牘凡三百篇嶠為人謹信居家純孝事繼母盡禮齊死廬墓三年鄉人稱之

黃滔陳司直墓

志云嶠兩娶林夫人

潘夫人子三仲田記

黃滔字文江泉州莆田人

一云候官人

唐乾寧二年崔凝知

貢舉得及第進士張貽憲等二十五人昭宗覆試于武德殿黜落者甚衆而滔被留光化中除四門博士天復元年受太祖辟以監察御史裏行充威武軍節度推官旋使錢塘與羅隱相得甚歡梁時強藩多僭位稱帝太

祖據有全閩而終其身為節將者滔規正有力焉中州  
名士避地來閩若韓偓李洵數十輩悉主于滔滔文贍  
蔚典則詩清淳丰潤有貞元長慶風馬嵬館娃景陽水  
殿諸賦雄新雋永稱一時絕調有集十五卷泉山秀句  
集三十卷時金石誌銘及國中大著作多為滔屬草滔  
律賦如明皇回駕徑馬嵬賦云日慘風悲到玉顏之死  
處花愁霧泣認朱臉之啼痕襄雲萬疊斷腸新出于帝  
猗秦樹千層几翼不如于  
飛鳥風調不在徐寅之下

徐寅

黃滔集正字鈞磯集  
俱作寅今從五代史

字昭夢莆田人登唐乾寧進



士第試止戈為武賦一燭裁盡已就有破山加點擬戍  
無人之句禮部侍郎李擇覽而奇之是歲釋褐授秘書  
省正字常遊大梁以賦謁梁王全忠誤觸其諱梁王變  
色寅狼狽出欲遁去恐不得脫乃作過大梁賦以獻畧  
曰千金漢將感精魄以神交一眼滄夫望英風而膽落  
九國志載大梁賦云客有得意還鄉遊于大梁過郊垌  
之耆舊問今古之侯王父老曰且說當今休論往古昔  
時之功業誰見今日之聲名有觀中一聯云遂使千  
年漢將憑吉夢以神符一眼缺望英風而膽喪梁  
王得賊大喜遺縑五百疋蓋全忠曾夢淮陰侯指授兵

法而晉王克用則眇一目者也已而走歸家里太祖辟  
掌書記唐滅梁閩使賀莊宗登極莊宗遽問使曰徐寅  
無恙乎歸語爾主父母之讐不共戴天寅指斥先帝爾  
國何以容之使回具以告太祖曰如此則上直欲殺徐  
寅爾今但不用可矣即日戒閤者不得引接寅拂衣去  
曰丈尺之水前陂後堰安能容萬斛之舟乎

九國志又云王審知

禮待簡畧內不能平一旦拂衣去

尋舊隱釣磯處慨然有長往志

寅妻字月

君與寅階隱寅有贈內詩云神傳尊聖  
陀羅咒佛授金剛般若經見湧幢小品  
竟卒於長壽之

別墅初太祖從子延彬刺泉州寅每同遊賞及陳郊倪  
曙等賦詩酣酒為樂凡十餘年常被病求藥物于延彬  
延彬答書善自調護亦可自開豁三皇五帝不死何歸  
蓋舉寅人生幾何賦語以戲之也

賦云七十戰爭如虎  
豹竟到烏江三千賓

客若驚鴻難尋珠履又云南陵公子綠鬢改而華髮生  
北里豪家昨日歌而今日哭又云常聞蕭史王喬長生  
孰見任是三皇  
五帝不死何歸寅賦贈炙人口渤海高元固來言本國

得斬蛇劍賦御溝水賦及人生幾何賦家家皆以金書  
列為屏障其珍重如此寅才思敏絕黃滔為威武節度

推官太祖餽以魚會滔與寅方接譚即請寅為謝賤寅  
殊不經意援筆疾書曰銜諸斷索裁從羊續懸來列在  
瑠盤便到馮驩食處時人大稱之有探龍集一卷雅道  
機要并詩八卷亦曰釣磯集又有賦五卷

其最著者過驪山賦畧曰

宅彼月窟光斯陵嗣猶驅六宮以殉塋豈言蔓草之榮  
結嫌示儆于當時更窮奢于既殒融銀液雪坑下地之  
江河帖玉慈珠蛟窮泉之日月嵒嵒層層不騫不崩斯  
萬之喉舌方滑劉項之雲雷忽興軹道一朝疊獻漢家  
之主驪山三月火燒秦帝之陵斬蛇劍賦畧曰磨霜礪  
雲兮熒煌錯落伊逐鹿之英聖有斬蛇之鋒鐔蓋以麾  
正乾坤劃分善惡楚國之姦雄徒爾烹若窮鱗常山之  
首尾胡為斷如朽索斯劍也哭白帝之亡符赤帝之昌

雖行大義亦假雄鉉龜文龍藻玉鏤金裝世亂將用時  
清則歲十二年兮如我年七十陣兮摧而則空山吞象  
之地豈鉉蓮錡大澤銜珠之血不汚星光勾踐進西施  
賦畧曰寶馬騰龍香車輾風迎織女於銀漢聘嬋娥于  
月宮望耀雲外喧闐洞中粧成而瑞玉凝影眼麗而朝  
霞剪紅曉別越溪暮歸吳苑越慮計失吳嫌進晚歌一  
聲兮君颯野笑百媚兮君心卷生令佞口因珠翠以興  
言上遺謀臣棄洪濤而不返勾踐乃走電驅雷呈馳箭  
雄投醪而士卒皆醉嘗瞻而胸襟洞開虎噬骨碎山崩  
即摧楚鞍所質化為鬼鳳閣龍樓燒作灰于是命屠蘇  
之酒上姑蘇之臺伊霸業以何去俄英風而韋來御溝  
水賦畧曰重輪而瑞照紅日五色而光耀彩霞時時而  
翡翠隨波飛穿禁柳往往而驚  
鳥逐浪衝出宮苑他賦多類此

翁承贊字文堯福唐人也父巨隅榮王府諮議參軍承

贊舉唐乾寧三年進士擢宏詞科任京兆府參軍累官  
右拾遺戶部員外郎天祐元年受詔冊封太祖為瑯琊  
王賜金紫以行易其居處名號曰文秀亭光賢閣畫錦  
堂黃滔為詩榮之

有建水閩山無故事  
長卿嚴助是前身句

已仕梁為諫議

大夫開平三年復為閩王冊禮副使滔復贈以詩尋守  
右諫議大夫福建鹽鐵副使就加左散騎常侍御史大  
夫承贊既依太祖太祖待之殊厚遂以為相承贊勸太  
祖建四門學以教閩士之秀者自號狎鷗翁歿葬建安

新豐鄉弟承裕舉光化中進士子鑑載希愈宋時皆入仕

論曰陳黃徐翁皆閩產也嶠以老成為邦司直滔負威鳳之才寅擅雕龍之質分鑣競爽要云無愧承贊榮施鄉里興學右文其亦大有造於閩矣

張睦

子庶

孟威

張睦光州固始人唐末從太祖入閩太祖封瑯琊王授睦三品官領權貨務睦搶攘之際雍容下士招來蠻裔

商賈歛不加暴而國用日以富饒累封梁國公卒葬福州赤塘山後以薛文傑代其職閩人益思睦立社城中祀焉子廡字居仁性孝友謙抑官至殿中侍御史彈劾百僚甚有風采及王氏政衰謝事歸田里立宗法建祧廟修祀事鄉邦式之

孟威

一作威

人天祐中從太祖為都押牙任建州刺

史有能名開寶中吳越忠懿王請于宋為太祖立祠福州乃以威與張睦等二十六人配享廟庭一時稱允



論曰昭武帝崛起閩徼攀鱗附翼濟濟多人然尚論功臣僉以睦威為首庸焉侑食廟庭要非誣也惜事軼不甚傳第稍次其大端如此云

劉山甫

鄭良

章仔鈞

劉山甫彭城人太祖入閩署山甫威武軍節度判官時海口黃崎岸橫石巉峭常為舟楫之患太祖思去之憚于力役乾寧中夜夢金甲神自稱吳安王許助開鑿因命山甫躬往設祭具述所夢事三奠未畢海內靈怪俱

見山甫乃憇僧院憑高視之風雷暴興見有黃鱗赤鬣  
非魚非龍者凡三晝夜風雷始息已別開一港甚便行  
旅即所賜號甘棠港者是也山甫故中朝舊族有才藻  
著金溪閒談十二卷常譔徐寅墓誌銘情文兼至為世  
所稱官終威武軍殿中侍御史山甫常隨父任嶺外歸  
泊舟青草湖登岸詣北方毘沙門天王廟見庭宇摧頽  
鐙檠不續作詩諷之

詩云自是神明無感  
應盛衰何得却由人

是夜夢神云

我非天王故南嶽神也主張此地何由見侮俄驚寤風

濤頓作倒牆絕纜山甫遽起悔過毀詩牌乃已

鄭良士舊名昌士字君夢仙遊人也博學善屬文唐昭宗景福二年獻詩五百篇授國子四門博士累遷康恩二州刺史兼御史中丞天復元年棄官歸隱貞明元年應太祖辟命轉左散騎常侍沉厚寡言太祖稱其長者有白巖文集詩集十卷中壘集若干卷子八人元弼有傳元恭缺宗時官秘書省校書郎元素別駕元龜第宋進士官至司馬元禮推官元振貲外郎元瑜秘書郎元

忠正字兄弟俱能文篤學時號鄭家八虎

海錄碎事又云鄭昌有八

子皆以詞學聞

號鄭氏羣虎

章仔鈞浦城人也先世居汴至宋兵部尚書巖元嘉初來守泉州始家於南安唐康州刺史及由南安徙浦城及生福州軍事判官修修生仔鈞深沉有大度年逾四十晦迹不仕乾寧時太祖代司空鎮閩奉表修貢仔鈞以太祖尚知有唐乃詣軍門上謁投戰攻守三策先是獻策時仔鈞登嶺上下天其夕地湧神瀆既至太祖果

大喜館為上賓執仔鈞手曰何相見之晚邪奏授高州  
刺史檢校太傅西北面行營招討制置使選步騎卒五  
千命屯戍浦城西巖山會南唐將盧某假道過山下忽  
鼓譟攻壘仔鈞堅守弗與戰遣二校乞援師于建安及  
兵退二校失期不至將斬之妻練氏止之曰時危未靖  
公奈何殺壯士仔鈞曰如廢法何練曰法固不可廢不  
若縱之使自逸耳仔鈞悟置不問或云二校者邊鎬與  
王建封也仔鈞累加光祿大夫持節高州諸軍事卒

後贈

金紫光祿大夫上柱國  
武寧郡開國伯忠憲王

弟仔釗子仁坦仁嵩仁燧仁昉

仁澈仁郁仁政仁愈仁鑑仁肇仁激仁耀仁祐仁聞多  
至顯官練氏別有傳

陳師先

鄒鑿

虞雄

陳霸先

伍昌時

子德普

王定簡

陳師先未詳其何地人太祖入閩時師先摧堅陷陳為  
先鋒將追賊至連江白塔嶺馬蹢死之縣尉程成之立  
廟以祀

鄒瑩光州固始人以宣府校尉從太祖入閩平汀寇有  
功未幾鎮鴈石卒

虞雄隸太祖戲下為牙將以敢戰名後戰歿于福唐漁  
溪土人立廟祀焉

陳霸先羅源人居太祖戲下為先鋒將戰勝攻克一軍  
稱為忠義勇敢久之追賊白塘嶺馬仆而死土人立廟  
祀之

伍昌時汀州寧化人父夢授事太祖官左僕射昌時生

而武勇多謀事太祖為偏將軍戰輒有功子德普少積學隱居教授終身以漁釣為樂

王定簡世為汴州人祖護父伸始遷福之候官縣太祖時定簡被署為安遠使頗有勞烈甚著名及太祖薨遂置其官以老

程贊

蔡儼

黃子稜

李霸

鄒勇夫

程贊

缺

人天祐時事太祖為威武節度都押牙雅有



幹材太祖以心腹畜之常同將吏百姓列太祖功德於  
朝願建祠勒石已而得允朱文進僭位署贛漳州刺史  
已而為留從效所殺

蔡儼字仁嶠晉江人節儉好施太祖辟為戶部郎中頗  
能其職終永春主簿

九國志儼為主簿秩滿就選試合格未擬官而卒儼諸子中最少而

俊爽人多惜之

黃子稜字元威洛陽人隨父入閩事太祖父子累官侍  
御史後避亂居建陽之東終焉

李灞古田人自云唐室之裔幼而禮遜孝事父母仕太祖父子官大錄事

鄒勇夫光州固始人以單騎從太祖兄弟入閩始終無二心及太祖封閩王勇夫官僕射為太祖敷陳利害勸其奉梁正朔後南唐蓄吞併之志歸化鎮適當要衝景宗命勇夫往鎮之至則民戶凋殘道路榛塞勇夫招集流亡完葺宅舍民稍稍越境來歸是時干戈日尋而歸悅獨晏然不被兵燹人物蕃阜勇夫實有力焉子相遂

家于其地

十國春秋卷九十五



總校官庶吉士臣張能照

校對官檢討臣王鍾健

謄錄貢生臣蘇曰柄

欽定四庫全書薈要

史部

十國春秋卷九十九

六至九

詳校官員外郎臣楊世綸



十國春秋卷九十六

檢討吳任臣撰

閩七

黃諷

林省鄒

葉翹

鄭元弼

王倓

黃峻

陳光逸

潘承祐

黃諷

缺

人以康宗淫暴與妻子辭訣入見康宗欲杖

之諷曰臣若迷國不忠死亦無怨直諫被杖死不受也

黜為民而歸

林省鄒福州人累舉不第慷慨好直節通文時政事日  
非會晉使盧損來聘省鄒私謂損曰吾主不事其君不  
愛其親不恤其民不敬其神不睦其鄰不禮其賓其能  
久乎余將僧服而北逃行當相見上國耳後不知所終  
葉翹永泰人博學質直惠宗擢為福王友官六軍判官  
命福王以師傅禮待之宮中稱曰國翁遇事多所裨益  
福王既嗣帝位是為康宗進翹內宣徽院使叅政事康

宗漸驕縱不與翹謀議一日方視朝時翹衣道士服過庭中趣出康宗召還拜之曰軍國事殷久不接對孤之過也翹對曰老臣輔導無狀致陛下無一善可稱願乞骸骨康宗曰先帝以孤屬公政令不善公當極言奈何棄孤去厚賜金帛慰之元妃梁國夫人者李敏女也賢妃李春鶯被寵夫人頗不見答于康宗翹至是諫曰夫人先帝之甥也陛下聘以禮奈何因新愛而棄之如遺乎康宗不能從殊為不平未幾翹復上書言事遂署其



楮尾曰一葉隨風落御溝放歸永泰以壽終

鄭元弼事康宗為禮部員外郎通文時元弼貢方物于  
晉康宗遺執政書辭旨不遜畧曰閩國一從興運久歷  
年華見北辰之帝座頻移致東海之風帆多阻又求用  
敵國禮致書往來晉高祖大怒以元弼屬吏獄具引見  
元弼奏曰王昶蠻裔之君不知禮義得其善言不足喜  
惡言不足怒陛下方示大信以來遠人臣將命無狀願  
伏斧鑕以贖昶罪晉高祖奇之賜帛遣歸未幾景宗立

元弼官諫議大夫景宗常因事欲杖御史中丞劉贊贊將自殺元弼諫曰古者刑不上大夫中丞儀刑百僚不宜加箠楚景宗正色曰卿何如魏鄭公乃敢彊諫元弼曰陛下似唐太宗臣為魏鄭公可矣景宗喜釋贊不咎居無何元弼遷禮部尚書判三司朱文進弑君自立元弼抗辭不屈黜歸田里將奔建州為文進所殺

王倓

缺

人通文中積官至同平章事為人剛直不畏

彊禦是時景宗官左僕射已倔彊有異志倓往往因事

折之景宗亦憚倭不敢有所發會新羅國遣使來聘且獻寶劍康宗舉以示倭曰此將何為倭曰斬為臣不忠者景宗居旁色變為不寧者累日景宗既立新羅復獻劍景宗忽憶倭前言而倭已死追恨不已命發冢戮其尸倭面如生血流被體聞者莫不痛之

黃峻仕景宗為諫議大夫永隆時宗室多以無罪死峻曰淫刑以逞亡可立待也乃昇觀詣朝堂極諫景宗曰老物狂發矣貶漳州司戶參軍峻又常謂人曰國事如

此合非永隆恐是大昏元年坐是以憂卒

陳光逸亦景宗臣歷官校書郎景宗既發王倓冢戮尸  
光逸謂其友曰主上失德至此亡無日矣吾欲以死諫  
何如其友止之不聽遂上書疏景宗大惡五十餘事叩  
頭流血勸以改過景宗大怒命衛士鞭之數百不死以  
繩繫頸掛于木久而乃絕

潘承祐晉安人初仕吳為光州司法參軍因爭郡大獄  
不得棄官歸閩仕至大理少卿天德帝為富沙王時領

鎮武節度使辟承祐為度支判官時與景宗構隙治兵相攻承祐極諫不納會福州使至富沙王大閱甲卒以誇示之辭氣益悖承祐長跪切諫富沙王怒顧左右曰汝可為我食判官肉承祐曰與其不義而生孰若抱義而死事勢如此早死為幸久之乃解及王稱殷帝以承祐為吏部尚書俄加同平章事是時幸臣楊思恭用事承祐復與爭又陳奏十事大畧言兄弟相攻逆傷天理一也賦歛煩重力役無節二也發民為兵羈旅愁怨三

也楊思恭奪人衣食使怨歸于上羣臣莫敢言四也疆土狹隘多置州縣增吏困民五也除道裹糧將攻臨汀曾不憂金陵錢塘乘虛相襲六也括高貲戶財多者補官逋負者被刑七也延平諸津征菜魚米獲利至微歛怨甚大八也與唐吳越為鄰即位以來未嘗通使九也宮室臺榭崇飾無度十也書上削承祐官爵勒歸私第唐查文徽破建州以禮致之唐元宗署為衛尉少卿遷鴻臚卿委以南方之事升降人物制置郡縣數用其言

薦陳誨林仁肇許文稹陳德誠鄭彥華多著功效老病  
乞骸骨以禮部尚書致仕隱於洪州西山卒子慎修風  
度醞籍博涉文史入宋為翰林侍讀學士有集五卷

論曰諷鯁切不撓省鄒孤憤無諱翹極諫被黜元弼激  
烈成仁皆濁世之僅見者也倏以剛方光逸以慙直並  
遭淫刑橫罹非罪視峻憂死為酷矣承祐備陳十弊侃  
侃直譚盡心所事忠而見尤王氏之不克永祚也宜哉

湛溫

董思安

王忠順

林仁翰

劉瓊

湛溫光州人嗣王時官御史大夫國子祭酒是時太祖  
養子延稟守建州與嗣王有隙遣使來覘虛實嗣王命  
溫往餞且鳩之溫懼開釁道經高安山西嶺飲鳩自斃  
國人哀之名其地曰祭酒嶺

董思安莆田人身長九尺勇冠一時與王忠順友善朱  
文進既弑景宗署其黨黃紹頗為泉州刺史思安因與  
忠順及泉州將軍留從效合謀復王氏遂殺紹頗迎天  
德帝從子繼勳主軍府事會南唐兵攻建州急思安與



忠順將兵赴難戰數不利或說二人當以去就計思安  
曰吾輩世為王氏臣今危而叛去天下其誰容我麾下  
感其言無有叛者城陷忠順力戰死思安全軍歸泉州  
後南唐以為漳州刺史思安辭以父名章元宗因改漳  
州曰南州時從效弟從願為副使竟鳩殺思安自領州  
事忠順晉江人

林仁翰仕景宗為南廊承旨

江南野史云仁翰為王延義內兒謂之南廊承旨

朱文進與連重遇弑景宗而自立仁翰謂其徒曰吾曹

世事王氏今受制賊臣富沙王至何面目見之帥其徒三十人被甲趣重遇第重遇方嚴兵自衛三十人者望之稍稍遁去仁翰執槊直前刺之斷其首以示衆曰富沙王且至汝輩族矣今重遇已死何不亟取文進以贖罪衆踴躍從事遂斬文進迎殷將吳成義入福州已而仁翰覲天德帝賞賜頗薄仁翰終未常自言其功人以此多之

劉瓊固始人天德初為永平鎮將南唐侵建州瓊統兵

入援師至鑄州聞天德帝已降唐衆兵欲推瓊為王瓊  
義不肯受自刎死部將收其尸葬山麓鄉人建祠祀之  
宋時賜額

曰威寧

論曰湛溫自鳩以弭釁其志有足哀者董王林劉捐身  
為國雖或生或死不同約其大指皆王氏忠臣也語云  
疾風知勁草吾於四人見之矣

顏仁郁

賈郁

方仁岳

陳洪濟

林揆

顏仁郁泉州人仕太祖為歸德場長時土荒民散仁郁撫之一年襁負至二年田萊闢闢三歲而民用足有詩百篇宛轉回曲歷盡人情邑人途歌巷唱之號顏長官詩

其勸農詩曰夜半呼兒趁曉耕羸牛無力漸  
羸行時人未識農家苦敢道田中穀自生

賈郁字正文侯官人以文策干太祖補仙遊主簿秩滿為令峭直不容人過正身奉法以風賊吏吏多畏憚之有客饋新果郁曰此獨非民間物邪卻不受客曰某家新果人衆未知郁曰君有子弟未曰昆仲三人豚子數

輩郁曰古人畏四知君兄知弟知子攜來者知是倍于  
古人也客大慙而退及受代一吏酣醉于庭郁怒曰吾  
當再典此邑以懲汝吏揚言公欲再來猶造鐵船渡海  
惠宗即位擢郁贊善大夫再令仙遊會醉吏為庫吏盜  
官錢數萬郁署牘尾曰竊銅鏹以潤家非因鼓鑄造鐵  
船而渡海不假爐鎚竟抵罪

九國志作  
決杖遣徒

已而改福清滿

考召為御史中丞

方仁岳歛人父延範唐末歷長

缺

古田長樂三令僑居

泉州莆田縣六子皆仕太祖父子仁岳官秘書少監以稱職名

陳洪濟

缺

人初令同安繼令晉江皆興學教士為王

氏循吏之冠

林揆建州人天德時為永順場官當干戈相尋之際政尚簡易民甚便之及南唐得建州升場為順昌縣仍以揆為令

十國春秋卷九十六